

любим бога, яко той первые возлюби нас».* Се бо извяляше богословный, яко любовь есть безначална отца и сына и святого духа. Яко бо сего ради бог сотвори человека по образу своему и по подобию, яко хотяше любити и, любя же человеки сниде с небес и одяся человеческою плотию, и умертвися за человеки плотию, дая образ любве человеком. Паки же богословный глаголя: «аще кто речет, яко любя бога, а брата своего ненавижу — ложь есть, ибо не любяй брата своего, его же виде, бога, его же не виде, како может любити. Сию заповедь имама от него: „да любяй бога, любит брата своего“». ³ «Всяк веруяй, яко Исус есть сын божий, от бога рожен есть, и всяк любяй рожешаго любит и роженного от него. О сем разумеем, яко любим чяда божия, егда бога любим и заповеди его соблюдаем».⁴ Се бо богословный, похваляя любовь, блажит творящих ю. Еже рече: «веруяй Христови от бога рожен есть и любяй от него же л. 184 о. родися, любит и роженного от него», си речь яко от него же сам родися, от того же рожешагося любит и яко брата менит. Сего ради рече: «яко любяй бога, любит брата своего». А еже, рече, любим чяда божия, сиречь еже по Христе единоверныя, яко порожешихся от единой купели крещения. Яко же богословный в евангелии написа о Христе: «даст им область чадом божим быти, верующим во имя его, иже не от крови, ни от похоти плотския, ни от похоти мужеския, но от бога родишася».⁵ Тако же и богозванный Павел к римляном написа: «елицы духом божим наводятся, сии суть сынове божии».⁶ И паки же богословный рече: «се есть свидетельство божие, еже свидетельствова о сыне своем. Веруяй в сына божия иматъ свидетельство о нем, а не веруяй богови, лжа сотворил есть егс».⁷ Разумеваем же убо, яко богословный написа, иже не веруяй христови, отчье свидетельство лжа сотворил есть, тако же и заповедем христовым не веруяй, не имей любве, юже Христос предаде, тако же яко лжа христовы заповеди сотворил есть, се есть антихрист. Яко же богословный рече: «последняя година есть, яко же слышасте, егда антихрист грядет».⁸ И ныне антихристи быша мнози, сиречь, иже истинныя любве не творяще. Се бо есть нелицемерная любы, еже никому же обиды °сотворити. Глаголют бо в мире: яко се есть любовь, еже сотворив пир созвати от своих приятель и соседы и елицы и ким нрава ради угодная творяхут, и тем друзи быша. Но не есть се любовь, егда бо кто творит пир на честныя мужа, сии срама ради множество многоценных брашен° учрежает. Многоценная же брашна множества всякому человеку от своего труда невозможно стяжати, но убо таковая составляются от властельскаго и насильственного притяжания, яко убо вельможа ничтоже имеюще от своего труда, но изьядающе и одяния носяще людская труды. Что бо естъ || за любы, еже насилну трапезу збирая мнозех оскорбляти недостаточствующих. Не мнозех же от честных мира сего, от таковых же елицы тако же недостаточствующих оскорбляют сих многоразличными брашны питати, многоценными питии, за сии нрав еже оному насилвати и оскорбляти не возбраняют и сами таже творят. И сии убо пиры творяще веселятся, а от них же се собраша, сии плачут недостаточствующа же кого призывают на се, яко да и паче истощится, к сим же много принося, несть бо се любовь, но многим оскорбление. Аще убо кто таким насильственным трапезам причащается, сии убо единомысленник обретается творящим и. О таковых бо Иоанн Богослов пиша глаголет: «Не любите мира, ни яже в мире. Аще кто любит мир, любве божия несть в нем, яко все еже л. 185 о.

* I Иоанна, IV, 19. ³ I Иоанна, IV, 20—21. ⁴ I Иоанна, V, 1—2.
⁵ Иоанн, I, 12—13. ⁶ Рим., VIII, 14. ⁷ I Иоанна, V, 9—10. ⁸ I Иоанна, II, 18.
 °° На полях ркп. против этих слов: о суетной любви.